



奉公王

在吾南部六堆地區，客家人過舊曆年有一個盡特殊个風俗，該就係「奉公王」。每年年初一「奉公王」个時節，莊項每家人大大細細聚概都集在廳下敬阿公婆。這時節，就做得看著弄獅來伙房鬥熱鬧，在鑼鼓聲擺等紙炮聲中，全家團圓、歡歡喜喜，新个一年就恁仔開始地！

該「奉公王」个時定著愛在年初一个第一個吉時！若係子時，嘎就在年三十該日暗晡十一點。萬一係在寅時，就愛順到第二個吉時，因為彭祖百忌中有一個就係「寅時不祭祀」。故所在年三十暗晡，食過團圓飯後，歸家人就在準備「奉公王」愛用个牲禮，俚等細人仔就等等大人儕个吩咐。

伙房肚个叔伯兄弟，這兜細俚人會先在伙房个禾埕打紙炮。大人儕會交代，該紙炮仔大約五到十分鐘愛打一粒。閒常時係搞紙炮仔，定著會食竹筴仔，歸年仔俚等就淨這一日搞係正當个。阿哥佢等蓋好膽，一手拿香、一手撻等紙炮，手指撻等紙炮个心，等看著點著火，佢等就同紙炮丟(tiau`)開。有時節，該紙炮仔正離手無幾遠就「磅」一聲，還得人驚。

俚無恁大膽，故所就同紙炮仔挽在點著个香頂項，算正香燒个時間，該兜紙炮仔共樣大約五分鐘過就磅一粒。這個方式算起來有過安全，毋過有時節會添放核到底該兜紙炮仔打核地無，等到行上前去看个時節，該紙炮仔堵堵好點著，「磅」一聲，還係會同自家嚇到緊跳。有一擺阿姊毋知俚有挽紙炮仔，行對該過，好死毋死就恁杓對「磅」一聲，同阿姊嚇著，好得無害佢痛過年。

「奉公王」个時一到，阿公就會用音響放笛仔。在客家笛仔聲中，阿公帶等俚等共下唱喏。俚拿等香、領幾下下頭，聽等阿公細細聲仔毋知在同祖先講麼个。這時節俚个心早早就走出禾埕！俚在恁，鄰舍个阿財、阿富仔、阿山牯同秀妹佢等毋知奉公王核地無？

等阿公唸核，俚同香交分大人該下，黏時就瀉一路出去同該兜陣黨共下。其實正放寒假該下，俚等就偷偷練習仰仔弄獅。阿富仔同阿山牯一個弄獅頭、一個弄獅尾。俚同阿財就負責鑼鼓，秀妹攞等竹籃仔討紅包。因為奉公王係伙房肚唯一一家人共下唱喏个時節，這下係有弄獅，該兜出外打拚賺錢歸來个人十分盼得包大禮。毋使弄遠，就淨鄰舍附近該幾個大伙房，弄得著个紅包拆來分，對褲袋搜就無兩尖錢个細人仔，該做得講係一大筆个收入。

係問「奉公王」係敬麼个神？大部分人都會講係敬阿公婆。其實「奉公王」係答謝各方神明个保護，分一家人做得平平安安來迎接新个一年。本成係愛去莊項个大廟，係無就伯公下唱喏，下後因為大部分人都在伙房肚拜祖先，定定仔就有人改安做「奉阿公婆」。

時代在改變，毋管係「奉公王」也係「奉阿公婆」，過年个氣氛還係有。歸家人團圓，祈求平安還係俚等過年最大个願望。奉公王前打个紙炮仔、細人仔弄獅，該種在紙炮聲同鑼鼓聲中開始過年个氣氛，在這現代个社會，嘎蓋像係老古个懷念地！

作者：陳志寧

☆詞彙學習☆

【聚概】qi` koi`：全部。

【痛過年】tung go ngian`：指過年期間耳體受傷。

【攞等】lo` den`：摻雜著。

【心】xim`：此處指鞭炮或火藥的引信。

【陣黨】ciin dong`：一起工作或是玩樂的伙伴。

【杓對】dag dui：剛剛好。

【兩尖錢】liong` jiam` qien`：很少的錢。